

近代中國史料叢刊續編第八十三輯
沈雲龍主編

猛

悔

樓

詩

王世簡著

文海出版社

有限公司

印行

猛悔樓詩

朱點題



猛悔樓詩題詞

樊山先生題詞之一

曩於報紙中見君詩詫爲奇絕問之周生王受知爲石
城王氏子年猶未弱冠也則益以爲奇其詩境淒豔明
麗中含古愁唐則長吉飛卿明則卓堯淵清則湯卿謀
之數子者才則茂矣美矣而皆歎於年與福故吾與王
受言願君極其才之所至衷於理而輔以學勿徒爲寶
閨之一體豈唯雒長詞壇抑亦望其大器晚成爲終童
賈生一輩人補恨也五月七日君果以書抵余并詩四
十餘首求定讀之覺奇豔在骨馥馥從心生翠刻肌冷

紅沁髓食煙火人一字不能道亦一字不能解也文字之道今幾乎熄矣僕少本不學老益無聞塾戶自封鷹講斂手杜門謝客毀譽兩忘然遇有異才美質佳語名篇又未嘗不含漱芳腴徘徊光景誠以天下最難得者才也不可不知者遇也不可不定者志也自少而壯而老無一日而可廢者學也不可永者年也定志以向學積學以成才儲才以待遇而識鑒器量閱歷非至其時不可剽而取也年何以能永亦唯守身以事親居易以俟命勿使幽憂傷人而已故長吉飛卿慈淵卿謀諸人其才誠可愛其詩不足效也士欲學成名立惟在上者

解惑之師中有嚴事之友而又虛心求益濟之以天縱之才未有不成者矣庚申五月十一日燈下樊山老人樊增祥讀竟書後

樊山先生題詞之二

先師李恂伯先生曰詩家須能八面受敵今世能此者唯吾與子耳先師張文襄公亦曰詩可多作詞不必多作詞以綺麗爲正宗日日爲迴腸盪氣語恐器量日趨卑淡試看周美成柳耆卿畢竟有何事業兩先生之言皆欲學者致廣大而盡精微勿以一得自封也抑少年有才氣人當先以韜斂芒刃讀書養氣爲主若以神劍

截端午巨糗豈不可惜心戒其妄動氣戒其輕發子房
得力在一忍字孔明得力在一靜字願足下採及芻蕘
勿使人謂吾爲失言則幸矣十二日早起又書

樊山先生題詞之三

古人云才可及年不可及童年而有異才萬人中未易
一二覲也易石甫十五六時斐然成章朝野交譽之旣
負盛名日與不若己者相處青樓薄倖畫餅無成年逾
六十仕不進而才亦退豈不可惜丈夫不受人憐然所
謂不受者僅自己不受而其可憐者自在也謹之於始
勿爲末路之悔成之於終勿孤長老之望少年秉君才

者所宜三思樊山再識

此册今日攜至晚晴移同社諸老見之交相稱嘆皆願
君好自爲之也十二日燈下

樊山先生題詞之四

日來接手書盛意冲襟見於言表天下惟糊塗人則自
是真聰明人未有不虛心者此未足爲君奇也自入新
世界以來正如博者日勝日貧病在愛國強種之談僅
借作門面語而人人思逞其攫金清晝之心而天下專
不可問矣中國維新數十年若礦政路政武備譯學禁
煙之舉莫非當務之急乃以賢智之過併其道德文章

而盡廢之以便其私而掩其陋非不自知其不可而悍然言之行之若曰縱後有復之者我固已取便於一時矣足下將游美洲此男兒四方之志甚善甚善唯迪其新知萬勿忘其舊德詞章雖小道然言無文則行不遠古來著作家制誥家專對家未有不從詞章入者特不可專作閨幃語如疑雲疑雨集耳此一冊詩時於幽秀中露蒼勁之氣從此多讀多做多商量未有不日新月異者總之立身求其有本立言求其有用興到之作則聊以自娛而已少年人詩文當如火如荼吉祥富麗親在不言老道在不憂貧君年未二十而前一卷詩兩用

白頭字甚不可也偶論及之勿怪五月幾望樊山又識

故財政部參事貴池王君行狀

君諱世彙姓王氏字調甫自號心雪安徽貴池人也考
滌齋先生衆議院議員妣氏姜有淑德君出清門幼徇
齊有聖童之目年十一僑旅順卽以文章驚其長老民
國五年試北京大學獲雋年僅十五嘗自許曰三百人
中余年最少也當是時政出強藩詐譎蠱起學術凋敝
人心錮塞而國勢日以削弱紹興蔡元培方長是校績
溪胡適懷寧陳獨秀掌教其間思有以拯之乃大倡新
學行語體要以革時弊爲亟天下靡然和之會政府假
外資辱國大學諸生大譁起而奔走譟呼執政者逮諸

獄羣議沸騰世所謂五四運動者也君與同學楊振聲
陳劍脩同在繫中執政者論曰諸生其具書悔乃釋若
君憤然曰國事蝸蟻至此使此舉誤吾甘繫獄苟不誤
何悔爲司獄者無以難之時君師胡適適至將護之出
謂之曰若縱甘長繫獄獨不念若母自若之繫已哭於
獄門四日乎君乃署初君之學於大學也以文采聞於
時與嚴旣澄余壽明程石軍縱酒塵詩極遊觀之樂爭
一字一均之奇巧至廢寢食而君詩獨以蒼秀淒豔冠
儕輩恩施樊增祥讀之歎以爲長吉飛卿蓋淵卿謀之
嗣音也復書三四獎慰戒勉至一二數千言論者謂其箴

君者至矣而君身世乃若樊君所逆臆豈不重可異乎
君既出獄益憤激條齋先生因資之游學美利堅君夙
精國故參以泰西新制於政法之源流平準之精義旁
及文哲諸學無不旁通交推以歸至當又以其暇爲歌
詩以寫海外風物幽眇奇詭動人心脾駐美大使施肇
基見之歎曰不圖國中少年乃有此才先後學於愛阿
瓦大學華盛頓大學獲經濟學士政治博士學位旋游
歐洲歷英法德意考其政治經濟而歸時君年方二十
有三也當是時秋浦許世英方總揆席以君父雅故重
君才辟爲國務院參議君感許君知獻替獨多而以年

少任斯席論者榮之北伐軍興南都底定撫寧李烈鈞
主國府許君介君於烈鈞烈鈞初不置意及往謁試以
各國政治之異同君揮灑萬言立就烈鈞大驚異以爲
奇才乃與許君介諸今行政院副院長孔公公時方長
工曹辟長商業司經營科通商科君在官勤恪奮發僚
友推重時工曹初創商事規制多君手定十七年北平
市政府辟爲參事以故不果行其後先後被命爲中華
合衆蠶桑會國民政府代表弟五屆國際商會中國代
表道出荷蘭識郭秉文訂交焉及秉文長國際貿易局
辟君長總務兼編纂二十一年黃郛長北平政務委員會

辟爲專員而東北外交研究委員會亦聘君爲常務委員皆稱其職願君以爲未足以盡其才也二十五年孔公復辟爲財政部地方捐稅委員會委員旋復令君主皖黔二省所得稅君明察廉勤譽不著旋以病辭乃改專門委員二十九年冬遷參事三十一年孔公設司專賣以君夙研是有素令主蘇浙皖區菸專賣命下君體已不勝力疾行至贛州竟以肺炎逝綿綴猶以官事爲念語不及私悲夫君本負濟世才文采斐然嘗以爲文學之才晚近所希又自負其兼而有也以爲天下事無不可爲及游學海外歸益自信其學慨國家之多

難內外侮交相乘也哀時憤俗又苦無術以拯之並
時公卿雖賞其才顧未竟其用嘗曰吾其終無所用於
世乎因益託歎縱酒自放發爲歌詩淒厲哀婉感喟深
至視少作之側豔者迥別矣而體亦因是益孱及膺繁
劇君以強仕之年乃弗克荷竟以微疾逝矣微特君志
業不獲就卽所爲歌詩乃亦不克極其才之所至斯豈
天爲之邪抑人事有未盡者在也君以身世侘僚抵掌
議論或不能無所詆謀而世乃目君狂抑知其微抱孤
識乃非盡人所喻乎君嘗曰爲其事而計其功者凡民
也必躋無名無功之域庶幾老氏之徒歟方君之主輯

東北月刊也憾國人昧交鄰義因勅編外交辭典積稿
至富愒置之其後他人因君之舊撰次成書君讀之怡
然以爲能竟其志也抗倭軍興君以備戰必資財財必
資稅稅必行其良者乃無擾民會孔公欲行所得稅及
國家專賣制飭屬集議所以行之盡利之道君皆與其
事深計密筭以求至當草創規制多出君手而君嘿無
一言余嘗見其考各國專賣制度累數十萬言稿積如
梵夾而君顧不以示人其闇然不自表暴之意豈近世
所有乎夫世之爭名者方術鬻爲高巧飾自尙肆其辯
說立談以傾動公卿坐以自致富貴者比比也君極意

功名而所以致之之術乃與時背馳宜乎悲歌抑塞齎
志以歿而世猶莫之諒也斯余所爲狀君生平而致其
無窮之憾痛者也君天性純篤篤於交舊而尤以獎人
才爲亟方君之官工曹也嘗欲拔其屬爲人所扼君力
爭卒得請君言詞雋美每宴集議論風生語驚四座而
伉爽質直誠慤出肺腑人久而彌愛敬之君之卒友朋
聞者多失聲可想見其爲人矣君生於民國紀元前十
年七月初八日卒於民國三十一年癸未三月十七日
春秋四十有二元配張夫人晚秋桐城馬其祖外孫女
繼室孫夫人燕華義寧陳三立外孫女張夫人之卒也

君哭以五古數十首時孔公方養痾北平讀之謂君曰
吾雖不爲詩然讀子詩乃哀愴至不可狀君詩之感人
可知而孔公愛士之誠彌可見已君匱以亂權厝江西
贛州南郭君夫人將以亂定奉安貴池祖塋君無子亦
將俟其季弟生子爲之後方余之居北平讀君蘭樓餘
大歎訖及掌孔公記室始得與君訂交十餘年以還以
文字道義相切劘而惜其縱酒自賊也嘗爲之深蹟太
息亦苦無術以拯之而君竟坐是殞也悲夫悲夫後死
之責義無可讓謹就所知君平生撰次大略當代立言
君子撰述銘誄有所考焉民國二十二年九月閩侯會

克出而謹狀

ノイリフ

猛悔樓詩卷第一

貴池 王世勳

少日集

秋夜至松壽庵道經十刹海有所感見記之

小鬟十五住青溪門外殘紅舊品題風定荷燈悔一笑
重尋蕭寺濕秋泥

憶古石城

收拾才名臥巖壑休將絃管近離筵春陰好借成竿竹
江雨時停上水船

春夜漫書十截句

紫蜂無力鬥嬋娟料理林霞遣百年緣上雲屏眠未熟
水仙春病薄如煙

鳳城日暮誅春遲紅上相逢一笑期轉爲孤鴻勞片語
亦曾賣賦鬥蛾眉

忽動珠簾風力微紅妝悄坐髮垂衣錦屏銀燭涼無夢
珠箔孤眠萬境飛

流水眞成宛轉紋秣陵寒燕泣殘曛他生重定桃花扇
酒陣歌旗各一軍

薄贈紅鬢買白雲長門歌舞最憐君酒闌自笑鷓鴣意
如此春秋尙未聞

見汝重柔此日腸閒徵文體入齊梁遙聞詩婢能傳語
自笑三投金鳳凰

柳枝妙曼舒春情池館玲瓏如新鶯一水半水初盈盈
行歌散作碎珠聲

朱顏星散愁無語數遍東南舊歌舞纔爲如花卜盛衰
天衣又濕亂壇雨

涼雨催春已滿池梅魂收拾一箇詩天襟忽射湖光綠
此是花靈欲放時

今年湖上垂楊老山靈長護朱顏好倘使青山舊有盟
不應孤夢蘭閨繞

青鳥

青鳥南來問紫綃十年春夢去如潮人間明月長無恙
海上離魂不可招龍漏侵眠金燼斷鳳簫催別玉樓嬌
江南楊柳多情碧猶向西風鬥舞腰

杏社雜事

燕居三載偶事聞歌激楚之音於某爲最余壽
明程石軍嚴旣澄與予日謀文酒之會寵辭錫
韻以傳之歌哭斯人歎歔前構輒爲惘然淚墜
黯然魂銷

芳日多風雨琵琶對冷春翠堆斜鬢尾紅惜隊主樓身絃

上月光滿釵邊粉黛新原知今日意忘却故時人
魂夢寧悲弱終傷道路長燕巢春貯怨花發夜飛香芳
樹忽然盡盈尊只益狂坐憐白日去掩瑟病幽房

五四之役與陳劍脩楊振聲同繫獄釋後書此

方疑永夜天沉醉倦鳥孤還誓獨眞夢底如花供醉眼
吟邊吹劍屬騷人少年老去紅顏死壯士歸來白髮新
柴市連宵眠夜雨慣持恩怨遺芳辰

笛怨辭

笛怨簫清聽未眞江湖舊雨散成塵平生只有雙行淚
半在蒼生半美人

相逢千轉濕春裳
夢起驚看十斛霜
花信都成惡消息
病梅疏淡水仙狂

紫蝶含愁春已斜
水晶簾箔駐雷車
一逢一笑二三膏沐
重問明湖二月花

簫語吟情漫不收
幾行翠舞酒邊樓
盈盈春雨侵紅豆
浣却東南何處愁

相逢漫勸冬郎酒
欲問江湖舊紫雲
腸斷綠陰不歸去
一生功罪只紅裙

怨絕丹砂偶倦游
紅樓風雨聽揚州
秋星疑是蟾蜍淚
散作天涯點點愁

不爲蛾眉修謗書驚心重過紫雲居當時網盡珊瑚淚
好報秋娘一串珠

心珠百劫證蘭因對鏡難銷白髮塵悔向朱樓貯恩怨
奇愁刻骨不關春

只恐香灰骨未灰海枯重待暮風回安排腕底秋來水
流向瓜州日夜哀

鳳紙鸞箋表玉京乞從文字成花城有人腸斷黃昏雨
願化春旛護一生

冰梅冷笑天桃老林下幽禽一一鳴來向朱樓臥聽雨
可憐春水似愁生

瞥眼人間秋又還紅衫珍重擲刀環爲君勤守十年約
老我桃花三月顏

訪嚴素於西直門

未盡情如草逢君百緒蒼有時恣歌哭無地避滄桑鑄
夢文心幻埋憂酒膽長琵琶絕沉鬱衣袖亦幽香

書杏社一事

曉風驚翠髻懷璧贈紅妝中酒花時病淩波白日狂不
能三致意唯有九回腸策馬長安遠零蟬噪夕陽

別北大諸君

入洛機雲在輕論並世才月明燕市別夢繞鳳城隈雨

照凡紅寂秋生林碧哀揮絃發沉鬱萬感爲吾來

與章盈五游西山夜宿碧雲寺

扶月入山去野雲初滿闌春危鶯作陣愁謝絮成團水
近雙魚遠燈紅翠袖寒江南簾一角休向月明看

春盡前一日

花莫誰溫自古魂芳風狼籍淚盈尊夜回歌扇月如昔
人散雷車夢更繁逝水年華輪綠葉殘春燈火恣黃昏
眼中舊雨離雲似何事青蠅苦獨喧

病懷詩與慰蹉跎誰窘蘭舷夜渡河曼柳障風舒妙舞
萬花飄雨雜清歌鶯啼夢斷一春去蝶化魂翻二月多

不分江湖搖落後有人低祝定風波

猛悔樓詩卷弟二

貴池 王世彙

長風集

南園柳下作

一雨似秋秋月遲捲簾迢遞柳絲絲酒濃無計夢能好
佩細添風舞却宜恨未成灰猶刻骨花能傾國已非時
故園一去繁枝謝翠袖紅燈不自持

懷事

輕憐薄怨受誰多萬種啼痕向逝波行盡紅牆心轉怯
舊時微慍近如何

將就學北美適盈五有巴黎之行集飲作此
却憐良夜盡休笑故人狂月淡分眉嫵簾虛透影香莫
辭千日醉珍取少年場國破將何往秋蟬咽晚涼

夏夜

縱酒甯關恨因歌聊自妍鳥遲知露滯林密隔星眠水
軟涼無夢簾陰淡欲煙蟾飢魂蝕月萬劫一團圓

赴美前三日有錢別於來今雨軒者相視黯然若
有傷離之意卽此報之

秋意飄蕭在柳枝雙顰脈脈各何思青娥起作回風舞
好滯蘭舟十日期

西風白浪躍長鯨秋醉如雲薄未成飛過青溟二萬里
高吟還恐夜龍生

尊前狂極醉葡萄滿地松陰七月濤萬里琵琶煙水闊
紅旗相送海雲高

取道京奉路往橫濱待舟渡美過鴨綠江時偶成
山深少人行日暮風雜雨空江月未上沙清鳥相語客
心殊徘徊憐此秋花舞忍候別所親慷慨去吾土

過漢城

風破滿江雲嫦娥斂笑出故宮殊雄麗日暮傷紅燭誓
言託青鳥心似江流曲

卷一
釜山馬關道中

十年國難在弓環風雨憐人夜渡關滄海微雲秋近畫
殘陽落葉鳥還山艱難白髮成雙鬢寂寞朱霞豔兩鬢
回首長安餘涕笑萬山不隔是親顏

與羔執抵東京承諸同學之摯待酒次狂談怒辯
痛家國之淪夷待發橫濱寫短章寄之

秋簫淒絕雨樓臺金碧當年望劫灰把臂欲傾憂國淚
盟心重醉濟時杯幽絃多怨歡何益冷月孤臨秋獨回
無語中原太沉寂夕陽點綴亦堪哀

至檀香山更寄東京諸君一詩

客中多雨潮音白衣鬢微雲秋意添欲破愁城呼項羽
重憐傾國別江淹蒼涼孤淚眞無益憔悴朱顏漫自嫌
恩怨沉沉天獨笑未應愁病百年兼

太平洋舟中所得詩甚多抵舊金山前一夕刪存

三截句

丈夫須族田橫島丈夫須冠卿子軍壯年便欲遁歌哭
天下英雄恐笑君

不爲百戰好劉季不爲罵座狂劉四聖狂之間且幾希
秋憐不是埋憂地

大智不屑學笑啼大愚不知學笑啼吾生智與不智間

退學故侯瓜滿畦

居柏克雷市就讀加州大學薄病中成憶事詩

初抵加省之柏克雷市與舊金山一葦可航其
地沿太平洋岸景物清淑故國故人之感無時
或息暫止學會東樓盪胸山色攪夢濤音京國
囂塵至此直疑世外矣秋夕散步寒林涼露侵
衣不適者數日靜療不出散書憶事詩十截句
蓬山明月碧城簫神闕天衣三五遙獨立燈青入海定
秋花如雪復如潮

白雪青山無古今身如幽鳥慣淒吟千巖百谷飛靈雨

來證伊人寂寞心

忽聞紅豆長吾廬萬古鸞飄書閣虛尙向史家記因果
長生一誓疚心無

平塘時有燕雙過舊鏡塵封涕淚多卷起珠簾秋似水
鴛鴦耐冷住微波

明珠不換蔡姬詞哀豔雄奇雜黠癡終是女郎舊風格
雷車走讀玉溪詩

壯年不屑心情惡日日歡顏照酒杯生恨春蠶意癡絕
願桑成海海成灰

江上飛寒夜不勝秣陵細雨聽春燈中原虎豹如人立

紅寺沉沉厭廢興

雪花如掌恣飛揚散髮斜纓雜醉狂談笑似龍詩似虎
百年天壤讓王郎

吾年二十嗟猶此草草風花殊不堪欲折芳蘭招楚客
白雲斜日住江南

輕雷薄醉夜聞車珠箔沉酣照水涯天女靈眠猶未熟
春來誰散斷腸花

明妃曲

讀少陵生長明妃尙有村之句爲之意興英發
因極吾意作明妃曲以壯千年上失意之宮人

所謂琵琶出處繫安危之語不亦足慚沮古今
來一將功成萬骨枯者乎

明妃二十顏如月走謫胡天髮似雪明妃馬上默無詞
慷慨琵琶日暮時絕塞無花成獨豔可憐辛苦待王師
春來斜月珠簾冷殿角殘紅傷心影朱顏顛顛委胡塵
青冢年年秋復春明妃明妃爾莫悲琵琶出處繫安危
人生但貴英雄耳可汗曾驅百萬騎不似漢家輕國色
烏孫公主淚如絲

七夕

月上疏紅照獨眠半樓寒淚刺冰絃願逢天地無時盡

終勝人間有百年

劫後心成秋水定開門
明月證生涯斜冠散髮入山去
獨坐空林數落花

心泉方潔若有微波因絮其意作微波辭

脈脈青娥理鬢煙獨來滄海數桑田
小樓夜雨無人到
自折瓶枝相對眠

散花斜髻對清歌靈骨含愁死不磨
苦向蛾眉搜麗劫
九天鸞侶恐無多

秋燈重撥麝煙斜夢繞春明弟幾家
鳳滯鸞沉千古別
蕭郎白馬杜娘花

日暮吳裙染古曛十分秋水欲生紋人間惟有雲無意
脈脈芳心莫似雲

夢繞星簾滯雨聲靈河西畔玉簫清紫閣夜下青鸞詔
佳麗天因痛哭生

斜日嬌棠麗似詩冷秋釀到一分時冰絲抽出愁千縷
藕太玲瓏蠶太癡

寒箏醉醒淒無曲麗思縱橫獨感秋古巷幽姿憐折柳
傷心重聽十年游

急雨寒潮不可分秋懷瑟瑟繞斜曛紅顏轉眼懶相識
恩怨輕於江上雲

三月櫻桃紅滿橋來時煙雨去時簫傷心數遍長堤柳
不是風前舊舞腰

生怪風愁惹絮飛簾陰百病減羅衣小闌干外花如雪
自折空花喚鶴歸

哀憤

海水夜鳴咽秋燈詩滿樓怨恩數斗血涕笑一尊愁烈
士虹爲魄美人簫散憂所餘惟熱淚何以謝吾仇
世遠古人近狂言雜楚芬從知高士骨長證北山雲歌
哭將何及飄零直到君明燈相向泣顛顛古紅裙

一千九百二十一年轉學愛阿瓦省立大學其地苦

寒冰雪五月每值夜讀極倦時輒寫斷句以自
舒其煩鬱之思潮零箋散佚者將不知若干倍
於是矣

南山之極不可眠北海之溥不可填吾生二十心茫然
吾憂何止億萬千湘靈鼓瑟過我前雙裙染蘭雜雲煙
並騎鸞鶴入青天天醉沉沉猶守玄但見飛瓊降秋筵
筵成歌舞何踟躕筵上顏色何便娟畫簾西捲雙星閒
銀潢淺水流涓涓伊人一水遙比肩伊人於爾深相憐
人生昔境畏今憶分謫沉憂億萬年

嬋娟舞倦碧天空欲呼明月出海東紅箋勸酒二百斛

中原豪傑醉如虹
前生十謫羅浮峯
梅花明月羅當胸
十年猖狂君不識
獨來入海聽哀鴻

歲在丙辰六月九
狂生挾策邯鄲走
邯鄲四顧悄無人
對罷紅妝對屠狗
紅妝零落如落梅
空山子豔空成灰
桃花未生水仙死
春風不送梅魂來
此時此境花憂極
鴛鴦哀怨琵琶泣
猛識鄰家玉笛聲
飛瓊老矣無消息

記石君事

昨夜飛瓊下嫁初
風無消息雨無書
黃金顏色如雲散
病骨江湖買酒居
欲覓溫馨惟有哭
卽論才調已堪誅
聞來料理經春約
殘絮樓臺一駐車

除夕客柏湖

江南芳草望吾廬何事風釵滯錫湖臘雨又狂瓊閣動
梅花已落繡燈孤夷門買劍千金血鮫室辭君一掬珠
日暮更愁青鳥遠故人滿地各何如

柏湖早春

春陰桃謝廢園花翠袖何因已怨嗟淚濕金貂寒翡翠
夢回銀燭照琵琶美人遲暮羞題葉故國飄零學種瓜
差喜少年能近道白雲斜月是生涯

將去柏湖轉學紐約

門前垂柳日紛紛樓上湖光今暫分劫後高寒疑似鶴

春來飄泊復如雲道人已失鴻都術故帝難忘號國君
梳盡楊絲殊有意應疑雲鬢立殘曛

康南海築天廬於西湖時論非之遠居海外聊詒

以詩

桃花紅弔故君居瀛水長流淚不如我昔三經上清路
至今重讀獄中書人間肝膽寒冥死劫後頭顱晚翠屠
堪笑偷安負君友康生賣字買天廬

二十一歲之生辰適居亞菲德村自舊金山預沽
五加皮酒羅羔執爲我烹鷄以壽思親懷國無
逾今夕矣

綠陰如畫雨如絲
夜送靈辰讀楚辭
空谷明簾燒鳳燭
菊花齊獻百年詩

菊魂斜雨雜詩魂
壽汝名花花欲言
回首西陵秋月白
琵琶擊碎海天昏

蘭燼重然日暮明
滿山荆棘紫駝驚
吾生原爲幽憂老
天意沉沉阮步兵

天壤奇馨不可名
鳳簫幽怨聽分明
邯鄲美酒瀟湘雨
恩怨縱橫一半醒

一九二一年讀暑課於紐約市外所居近鄉村舞
塲午夜夢回絃音猶沸以視故國迥判入天寫

此獨餘深慨

昨夜蓬萊小遇仙來時滄海去時田不知人世幾憔悴
猶見神仙弄管絃

初秋眉月娟潔是夕或即古歷七夕也

書生懷抱終何濟猶憶蛟龍天上時豈有鴛鴦甘獨夢
却憎烏鵲負佳期酒邊願證長生誓月下空填乞巧辭
昨夜珠簾燒鳳燭低徊不似舊蛾眉

秋雨

斜月深燈人未眠不知今夕已何年平添秋水三篙綠
好泛橫塘十畝船荷影雜開微雨際衣香還繞好雲邊

平生此骨誰憐得掩卷黃庭欲遁禪

西風

西風迢遞有微波
絮瑟依依背月過
春事曾傷鶯燕嫉
歡場空忌鷓鴣多
酒痕亂似狂時語
山色青於病後蛾
猛憶江湖雙絕在
小梅才調小雲歌

游尼格拉瀑布入加拿大之維多利亞公園

點點秋山日日斜
浮雲一片是吾家
詩中亦有丹青意
落盡江南十畝花

花時

春陰桃李十年灰
舊事花枝滿鏡開
劫後雙魚久沉寂

芳時一淚自徘徊掠波空渺重歸燕銷骨難辭無盡杯
惆悵亂雲送君去但餘殘月照深哀

詩詢京中諸友

朝辭北海夜崑崙宛轉蘭言動九閩虎豹萬重新有翼
江山一別舊無痕晴川歷歷春潮急珠水瀟瀟夜雨昏
自是少年重哀樂不關花信亦消魂

養疴郊外偶成

病裏吟詩日又曛天將涕淚向紅裙荒江十葉輕帆至
淡墨千行古膽芬深巷塵凝雙燕嫁遠山雲黯淺螺分
秋燈斜讀田橫傳始向西風一哭君

精衛東溟事絕憐
雛鳳才名世未傳
明妃綺歲曾憂國
至華冷山謁菴
園亭垂柳日紛紛
已迷前路欲留君

波多墨河畔
時有幽禽冷可聽
山鬼一聲天地青

華盛頓會議

異姓忽逢君起傷機與雲懷璧淪塗炭餘子何紛紛昔
有楚謫人行吟悲幽芬更論嵇中散於子欲何云起視
朱日沒白髮生如焚傷哉江湖老蛟龍豈無羣

將之英倫念居美二年之影事寫數語以存之

杏社少年吾與君詩力殺虎氣拏雲杏花殘落天地白
吾悔靈臺貯腐文遂結神鸞摩天走日日心枝發紅豆
老猶未來髮不青傷心誰管春人瘦無限殘雲飛鳥哀
寒山高月苦徘徊紅愁翠怨年年事流涕何因杯更杯
豪來海上問明月清極林間飲冰雪射虎屠龍事等閒
靈臺長貯千秋血少年原合老輪蹄萬里二年東復西

愁絕謝看雙袖舞天風猶護一燈啼

紐約待舟發歐洲

太行不險滄溟淺萬里縱橫東復東揮手長川一長笑
北風吹我作征鴻

少年難殺勞生骨青鳥原無謝罪書滄海放吟三萬卷
到頭能值一錢無

大西洋舟中雜句

與君凌海待雙成五十冰絃春月明若問故園豺虎臥
蒼涼惟有曉鶯鳴

英雄萬古梁紅玉哀麗絕人晉綠珠攬史一啼復一怒

腐儒誅我定何如

游凡爾塞離宮有寄

君意柔於三月柳妾心曲似九回關野雲送我滿雙袖
好月嵌天纔一丸白袷獨窺神闕復紅旗斜護酒樓寒
夢中若訪西陵路數畝垂楊百鳥繁

偕盈五至楓丹白露歸經白盧尼湖泛棹至月上
松陰雜飛絮暮景畫兼詩疾鳥翦江過深雲出月遲林
風分霧迹孤燕動遐思斜日臨妝罷春波拂晚脂

謁拿帝寺

生不能爲華盛頓敗亦當如拿破崙凡花凡草休相莫

萬劫湖山拱墓門

三月十一日客巴黎市外之聖克盧離宮旅邸

虎踞功名徒苦辛
鶯花昔與六朝隣
一生最厭將殘日
百計難回已去春
劫後衣冠聞故帝
尊前涕淚等微塵
雲如仙袂飄然出
絕谷層崖似有人

春盡夕猶滯巴黎書示盈五

微微香霧散簾間
明燭先灰鏡裏顏
稍負鬢絲問啼鴂
各無心力駐飄鸞
新成金屋煩梅聘
悄入珠宮帶淚還
慧業釀愁嗟逝水
九州神豔鬥眉彎

與鄧季宣程演生辦法皇廢殿

來持枝漸謝萬谷踏春寒廢殿青燈黯桃花落照殘窺
入一白燕懷古半闌干生事何哀樂悠悠盡日歡

居玫瑰村一月客邸春闌雨夕作此

蕭蕭窮谷夕薄薄萬枝斜晚鳥風前亂飄英雨際譁衰
茶雲待翦縱意暝能賒桃李嗟何惜堪憐異歲華

至里昂遇狄君武蘇梅鄧季宣用狄君見示均

三年前事風兼雪煮酒曾尋今又來往事只煙差可擬
勝游如水益難回吟魂空縛殘春繭慧業終憐盡日杯
行遍珠簾方七八酬詩辛苦爲君裁

柏林秋辭

善感多思如僕者每因其感其思以成詩詩成
又未嘗不自傷其哀惋逾恆而纖豔傷神也去
國三年間持吟戒然因懷遣韻積感成聲懷感
之極誰喻其微捲簾納風以受花香幽鳥暗泣
寒紅不生淪謫人天歡非憂敵來客柏林近二
月所得詩均曰秋辭

來日淒然爲去日今生何益有他生誰家院落餘苔迹
薄暮能無幽泣情

數年來往悲歡境墜玉粉淪脂竟不還微惜相逢重萬劫
孤軍一幟出禪關

年華柳弱怨風生海外空聞曳佩聲我替女郎深禱祝
來生福慧字雙成

夢斷燈殘每惘然無邊幽泣限詞箋生涯誓欲焚心盡
再滴胭脂八九年

年來騷雅付村歌一夕清辭起宿痾從此別開詩境界
宋唐而外異軍多

無端恐被佳人怪少小狂填拾翠詞酒罷含靈復含怨
春來纔喜柳如詩

人影去隨雙去槩微生行盡數行詩焚香但見愁絲嬝
此亦逃禪未敢時

春魂尋遍白門西七八珠簾宛轉啼欲護鴛鴦前夕夢
翻憐薄醉不如泥

驚人海水不如酒長壽紅妝只有詩自古猖狂竟何似
我生高踞盡崖時

東苑崇桃看漸謝西樓垂箔可能開願君明鏡無塵積
留待驚鴻顧影回

紅燭終焚宛轉心層憂萬疊直成今春魂不語蒼冥去
斷鳳三年無處尋

重戒重破詩與酒自遣自尋夢與魂偶然人間作奇想
側身嬌喘百肢溫

少年筆挾胭脂氣，媿古蛾眉萬古朱。靈態百摹終不當，
空山梅種兩三株。

消息今春依舊侵，重簾密閣對霑襟。可憐清到秦淮水，
嗚咽猶成出谷心。

啼笑春來漸渺茫，當時裙屐費評量。蛾眉意態無煙火，
誰授人間辟穀方。

歸計

江南萬木好歸計，一生疏海上梨花。日春風煮酒居

與公儉漫游，德屬來因河流域。

賈生悲命亦憂時，楚澤千年弔豈知。曾笑牛醫一身手，

漫悲禹甸半瘡痍青燈照史人如玉白水尋盟秋可悲
猶欲狂歌凌海去百年煙雨一舟詩

公儉先歸柏林余獨溯航來因全境覺人文雋美
勝德之北部多矣

野雲隨水過空庭一岸秋燈一岸星天與湖山奇點綴
恰如西子住西泠

維也納小住後渡多惱河至匈牙利之布京臨河
晚眺有水鳥掠波而飛計江南此日歲云暮矣
江天夜靜星如月晚鳥疾飛三四葉燕恐妾愁郎不愁
銜向江南又江北

游巴爾幹半島風雪兼旬小憩羅京以二詩寄時

報來因多惱均歐洲曾經之名川也

一心獨據天人際衆象皆緣哀樂眞不分工愁更多惱
難明去果況來因臨風匿笑無家別攬鏡空憐極目塵
回首天涯斜影動數枝紅學故山春

紫蝶青蜂怨未平層闌回首萬星明欲摩長劍銷兵氣
翻厭繁絃亂雨聲夢底疏花自開落酒邊微慍太陰晴
夜來鄉思知何似千谷秋雲縹緲生

待伏見丸歸國偶憶巴黎忽有去住皆非之感

亂帆如葉散如鷗人靜無言月上樓半爲懷親半懷友

將身欲作去來舟

穆王何事滯神車
麗骨傷離病海涯
無奈春愁閒未得
梨花謝後又桃花

舟行紅海月夜得句

得境多從尊後前
十年寥落最今年
不知海月將何意
耐向滄波萬疊眠

風微時恐夢參差
響佩何因立露華
我本天涯例飄泊
海鷗何事亦無家

猛悔樓詩卷第二

貴池 王世彙

東還集

歸視太樸樓有懷

忍記秋簫縹緲聲紅樓回夢定何生
繞胸悔有人如玉縱不成煙已百城

月魄深垂簾箔居江雲來妒爾憐吾
故人意氣將殘燭論到恩仇淚恐無

春盡鸞天苦覓詩可憐蠶死尙含絲
蛾眉夢斷頭新白桃李輕寒費護持

少小從龍意未休吳鉤夜入塞風秋書生漫說頭顱賤
異日須求萬戶侯

暮愁

壯夫不遇朱顏老攬鏡荒茫起暮愁萬劫空山坐微月
幾重滄海得孤樓治生十有九人病覓夢百常千歲憂
誰識夷門抱關客賣書買劍願難酬

春夜沉醉書示曉秋

鸞跡高寒空獨期傳箋聞似九州遲春愁不約來如燕
夕照無多憶卽詩漸有夢沉摧鳳翼斷無人解忌蛾眉
縱輸十島煙波外只隔簾波待怨誰

罷理長眉倦略勝琵琶淒烈最高層
林花破睡嗔鶯未
春水無人只燕曾乞半蛾青
微月照向千尊盡衆魔仍
朱飛綠長年年淚無象伊誰無燄燈

春夕對丁香花

歡更無歡悲漫悲滿瓶空憶薄胭脂
東風似虐原非虐
不盡殘枝忍待誰

人間

人間不合有二月海外徒聞更九州
夜雨青燈梳白髮
荒江秋水長清愁羅胸劍氣雙虹白
入握山光一葉浮
風掠珠簾已何夕
夜闌微笑淚長流

六月十六夜成一詩

舊淚曾侵百幅綃
高天大鶴自扶搖
今宵一乞班生筆
好補眉端兩段嬌

枳鳳荆鸞事已非
東南日夜海高飛
明戈未抵描眉筆
奪得金焦兩點歸

七夕後避暑北戴河坐第五橋邊海水羣飛夕陽
掩映雖非天上亦遠人間也

新結蘭游恣十洲
鮫啼虬語夜難休
更愁襟袖煙霞少
翦取江南黯淡秋

劫雨雙鬟翠略刪
幾回紅淚作微瀾
青空紫樹秋何在

證取羅襦怯暮寒

愁壘禪關刻意侵
晚風吹薄酒人襟
萬千天祕微茫極
石裂魚飛證已深

雙星奪月月匿笑
肯照須臾歡更悲
巨石如拳帆似鬣
海風吹夢淚時時

百態只於尊影息
一燈長向夢時灰
便經萬詰千商略
剩少驚鴻意肯回

急雨驚濤翻石骨
長天秋意冷斜陽
他年重記哀鸞語
知碎空山幾劫腸

北海小飲

珍珠密字入淒清淚濕天衣拭月明無可思量成逝水
每緣魂夢得他生石填慧海哀難寫雲失愚山願竟成
蕭瑟年年數陵谷陸沉只合與鷗盟

長崎會議事畢後養疴於雲仙溫泉

偶緣寂久喜鳴禽脈脈寧堪夕照沉枯塚漫騰龍虎氣
深杯漸鳩鳳鸞心倚天一劍餘孤憤據壘千蟲有壯音
月上寒塘憐鬢影秋來十日病愁侵

登萬壽山

亭館當時起垂楊低繞牆滄桑登廢閣高翠出重堂金
碧緣誰盡芳菲恨自長秦宮太蕭瑟誰省牧之狂

七夕前一日僧大兄及夏子青飲於漪瀾堂眉月
西墜荷風北來猖狂之懷一發莫遏爲賦二律
以壯子青之行兼記此宵之勝

良夜繁鐙照海明江山誰主月空清眉痕涼乞簾旌護
心影秋呼劍佩迎紅豆有情應有恨青荷無語本無生
臨流忽見緇塵滿便欲崑崙頂上行

上清女伴繡帷開眉月新描無恙回斷簡冥搜甯可說
層樓延佇只餘哀嘔肝妄作千秋想握骨眞憐數寸灰
何日百尊同爾盡更攜城郭入詩來

西山月夜擊溟以詩示我卽此報之

無量恆沙數劫塵萬山一月照詩神海枯可待魂先悴
天問難親意薄嗔不用吾謀憐故楚尙存此舌入強秦
虎狼須避何須避斫地橫刀正有人

靈辭

春裘酒濕雨夢南飛望五里之飄泥風原似虎
撫四方而流涕客固猶龍霧夕煙晨簫朋水逝
冰簷霜瓦初月眉生遂欲揮萬感於無言廢喧
歌爲永歎然而將軍夜獵傷醉尉之侵陵烈士
華年攀紅旗而悲詫豈爲鶯燕遂有沉吟細數
平生不無幽恨靈辭之作蓋有由已

簾底微風酒暈勻輕裾題滿萬方塵靈辭字字驚天下
絕賤當年龔自珍

海棠綽約意中秋酒沸絃歡底事愁詞客生涯半閨閣
夢回紅淚濕吳鈎

五里城南朔馬諱寒燈夜過酒樓家春心不被飄零踐
苦李酸桃解著花

豈待邢眉取帝恩爾心吾魄門溫存燈紅乞許歡神證
密影年年印一尊

風旛無力雨無涯一樹輕愁散落花掠髮眉痕門新月
太行雙脈走龍蛇

女郎高坐事筮篔篹涕唾都成陵谷憂白面談兵狂可諒
不誅十族不封侯

綠闌干遠更橫波數疊箏樓透細歌夢自鴛鴦心自瓦
爲誰苦護露涼多

帝座從無赤鯉魚鷗波萬疊更何圖眉痕齒屑二年待
翠幕羅襦一世居

山鬼烹鸞鸞夜哭胡沙動月月西斜肯因曾過祈年殿
重棄狂禪重歲華

秋雨飄蕭病國門千鐙奇燄動黃昏橫戈十萬降車急
去掠公侯報爾恩

亦知天下非一我亦知天下非一
汝兩心戀嫁但無間
鈿合釵分空復語

輕塵夜襲只緣渠
萬里會逢靈魄無
落月半襟花一鬢
秋燈淚報使君珠

枯葉今成無字禪
送秋風物只寒煙
人間如海繁陰失
寂寞芳心最暮蟬

簾定香焚誓有因
高樓聞唳最傷神
邇來翻愛秋林雁
日日飛寒爲一人

豈盡人言我始愁
夜闌嗚咽替寒流
青禽銜出雙紅淚
半濕鑪煙半濕秋

偶感

良夜清姿任爾多雙鬢纔翦又雙蛾微憐旖旎如雲夜
來伴淒涼對月歌肺葉豈勝風雨撼心苗長怯病愁磨
只今欲渡蘭橈遠奈此眉波激盪何

天強以夜坐八律見示詞惋旨哀真有同感因次
其均會以一律

幽棲絕似飛瓊謫弄鬢回姿百淚傾落落歡懷秋後葉
依依軟語別時情霜寒雲掩嬋娟影酒薄愁來猖獗兵
人海喧騰更何與長宵聾對萬蟲聲

北京飯店望雪

素女吹瓊水一涯秋益略損傲霜花淒涼暮雪迷么鳳
斷續寒風亂晚鴉長夜飛揚揮日住好峯奇突任雲遮
平居久爲幽憂憤豈必登臨感歲華

綠鬢行

綠鬢吳娃也有聲鳳城有燕市花之譽會就學
培華女校嗣以愛戀婚於王氏離異後復適浙
西徐君徐蓋亦棄其婦而就鬢者羅敷背夫使
君厭故豔聞所播毀譽時傳長詠旣成徵詞斯
託矣

繁花飾地風憔悴春燈夜沸春人醉何處春燈照玉人

鳳城綠鬢嬌癡最綠鬢遙聞出貴家年年花后領培華
聰明冰雪人天際海外疑移解語花阿母中年最憐女
買妝不惜黃金兩妝竟回身恰自思儂顏不信真如許
嬌縱由來半夙因深閨肯擲綺羅身長安日麗香雲簇
如水風神悄辟塵春寒旖旎春衾重脈脈靈犀紛綺夢
寂處微憐學呀鶯雙飛願效尋巢鳳高梧金井意徬徨
紫鳳驚寒夜有霜爲懺穠情返瓊閣翻然二十嫁王昌
妾懷矮婿郎英武新月解描眉樣嫵西海初嫺虎豹韜
王城豔說鴛鴦侶好夢依稀似水東珠衫零落淚珠紅
清歌曼舞情無極在鳳羈鸞怨未窮翻令鳩媒兼鳩毒

抵虛射影羣魔掖郎本何心老鏡臺從軍慷慨東南役
可憐衆卉濁名花愛葉情株次第芽星履霧衫珠十斛
踏莎盛譽滿天涯良夜迢迢歌彌旨一身孤擲情波裏
玉樹交柯妬舞狐綺年直欲狂歡死年少徐君海外來
丰姿弈弈早春梅香山詩體嫵能解洛浦神遊夢自哀
一朝舞榭歌樓畔佯羞還睇逢何晏怨婦捐愁秋士歎
照眸明月圓纔半夜夜銀燈照畫屏畫屏迤邐滯雙星
使君鴛牒殷勤記戀海狂礁怯更經還珠垂淚非儂願
將水捏泥生死戀安得東南孔雀飛遺巢讓妾孤零燕
密誓深驪意萬重郎今相悅復如儂情絲慧劍前歡盡

海國芳風今却逢
詩辭絕妙梁鴻語
將玉證情無今古
玉佩寒馨世所稀
撫心突躍將焉處
應憐舊婦復新昏
北海清漪誓一尊
萬不可圓終強合
兩無遺憾只人言
南來湖上排日遊
遨湖樓煮酒山翠
浮杯畫舫吹笙歌
聲在水人間仙境
爲三絕句頌之

涼雲拂柳長堤沒
初月凌波一黛青
歸去煙痕忘未得
湖心風雨影亭亭

散花悟澈病維摩
魚信沉沉怨晚波
獨向斷橋過七夕
鴛盟不及鵲情多

何當驢背酒盈壺
便謫煙波伍釣徒
肝膽照人靈隱月

浮生知己一西湖

感逝辭

余夙負幼慧之名長承鄉曲之譽恣其心力期
效明時歸國以還寧知憂患避地淞濱深樓懷
昔餘歡襲骨柔涕盈襟他生之緣會難期竟夕
之酸辛彌熾因念二年沉病一夕長歸愁骨與
病骨俱銷脂香雜粉香莫辨銀尊夜雨柔翰春
朝此意悽惶人間何世輒得小詩以紓深戀
湖海幽憂未略閒驚聞消息到青山年來賦鴟長沙淚
豈合低徊更玉顏

淡墨含愁看未殘
玉棺玉骨已同寒
西風無限橫波惡
學得鴛鴦總不安

青楓照水葉蕭蕭
離亂年華住六朝
一束寒花人不祭
夕風憔悴咽秋潮

柔歡刻畫夢難閒
驚起啼魂恍惚還
辛苦碧城前約誤
他生何物是人間

香車重聽夜磷磷
歷亂難歸陌上塵
劫後淒寒蕭寺雪
靈籤愁絕問前因

白門冬感

將軍蕭瑟蔣山橫
小閣江天待雁聲
濁酒鯨傾桃葉渡

西風虎嘯秣陵城殘碁歷亂樓長勝斷夢酸辛枕不情
絕愛吾家千古燕寒磯翦水尙堪盟

北來

當年縱酒尋春地今日蕭然一匱陳漸覺負人成獨夢
憶從惜別得輕顰空江浩蕩沉璫札冷寺淒清遣玉人
此意自傷更憐一兩花時同負綺羅辰

病夜

江峯依約雙鬟似好夢低徊怯倚闌萬劫有情終化蝶
九京無地足棲鸞露零蕭寺支離骨雨打孤城寂寞寒
憶得年年芳草夕不曾消遣似今難

冬日觀海吳淞

朱燈初列醉忽忽如此緘愁却未工濁酒逼人尊畔淚
驚風遠我意中鴻十年長恨橫天末一樹繁憂散夢中
剛寫臨流無限憶海波鬱沸欲凌空

掃葉樓晚坐

一笛河山劫更非亂雲和墨寫詩歸靈風不護花愁謝
怪石剛如酒怒飛欲汲寒泉揩短劍只餘幽憤襲征衣
春來塘水明如許人減腰肢柳漸圍

奉命赴荷蘭出席國際商務會議道經西伯利亞

抵華沙時書寄國內

代表本國出席第五屆之國際商務會議於荷
蘭之故京取道蘇俄車程十日始達華沙就食
甫畢縱車游全市長橋臨水徙倚多時落日沉
山計去國已十四度此暮春時候矣壯懷柔恨
交襲離襟吟望雲天不知宜歌宜哭也

故邱故壑平生意淪謫年年抗淚行零燕依人憐廢壘
芳塵將夢越重城盈尊縱酖安辭醉短瑟含辛空復情
月靜漸憐天壤美幽馨斷續與愁爭

重來柏林晚色湖

紅葉江鄉樹亦秋臨流白髮照深憂亂離文字燕然石

儘夠煙波渺渺愁

會議既畢取道瑞士夜宿諾依其地拔海約二千
米突矣漫書寄盈五巴黎

繁絃夜夜結層思鳳泊鸞飄未已時漸覺無情惟故國
可堪有怨寫靈詞江山此夕供憂患湖海微吟雜點癡
波泣魚飛入坐對弛將心力專雄奇

印度洋舟中漫句

秋懷似水清無似短夢因風散復還我亦精禽與靈鵲
年年心恨白鷗閒

春雨觀梅太湖

年來楚澤殷憂意豈對蒼茫始有詩收拾湖光落尊底
動人情思此何時

少年十萬里歸來襟抱沉沉鬱古哀忽向花間覓知己
偶然回首萬梅開

寒波寸寸逗微醺惜去臨流日又曛十一萬年花落盡
應餘哀怨作湖雲

春來煮酒託寒槎濕却春裘爲此花聞說南朝煙雨軟
緣何零落半天涯

數枝寒萼凌煙雨十里歸雲橫水涯雋意壯懷兩無礙
一生能拜幾梅花

七十一峯填作海卅六千頃鬱成田此皆億萬年間事
而我何因獨泫然

秋浦世丈五十八歲生日

古人豈必今人若漫熾心香與古期峻意高寒擬遙月
秋懷激灑託清卮當風芳樹留無計掠夢心雲懺未遲
一掬危星墜天末憂時宿淚不須疑

秋夕

屋倚寒塘漸足居懷親悔絕過江裾恩仇苦爲虞戈短
憂患來從頡字初夢仄八天艱去住海飛金碧復欷歔
何心更作通明乞生作秋棠已不如

猛悔樓詩校記

早歲旅學秣陵初未習章句六年秋北游國學童年好事恣飲苦吟置酒高會謬附騷雅雖窮終夜之力覓一韻之巧不恤也庚申早秋慨然去國投荒數載薄有所成繞地一周經國二十驚濤漂搖冰雪轉徙旣歸瀛海之帆益恣江湖之感數載以來每不勝壯不如人之嘆夜闌酒沸積感成詩殆昔人所謂以無益之事遣有涯之生者非耶飄零人海百無一成並此不存人生何爲暇一檢校兼及舊作得詩盈篋約略存之嗟夫僕值盛年時際鼎沸紅旗落日刁斗驚聞夜露重城驛騷猶甚

固已極江關哀亂之思矣乃更名花空谷委之蒿萊天
馬黃禾置以下乘於是託辭遣墨宛轉抒思香草香奩
諒在知者

此一冊詩展轉索覽者時有其人而刊諸時報者尤爲
時流所最錄昔事追維輒生猛悔江山文藻相對沾襟
此冊之存聊存昔境而已猶憶五六年前旅居柏林時
所作秋辭有重戒重破詩與酒自遣自尋夢與魂之句
捫索前塵依稀此日心綸慧業正不知何日一刪結習
也

南來暫事部曹簿書鮮暇偶理舊作散佚者殆半而詞

惜不當意者又刪去十之六七此冊
或事有寄託或辭足流傳敝帚之田
時致力學境流遷應有此稿悔存之
酒故紙縈心野雲橫樓寒蟲學語此
其他其後矣

此冊以時境之分勒爲三卷曰少口
未出國時作會就正於樊山先生
曰長風集爲就學美國及游覽歐洲
歸國以後作既居秣陵雋懷日寂
二三年所存僅十數首而已

生平所最感竊至今莫稍能釋者惟樊山先生先生於
彙初非戚里故交而尤齒德懸殊高山景仰當彙就學
北大時一箋致候附詩求正而先生訓勉激勵至二三數
千言語出至誠爲畢生所最服膺之訓迪每檢手墨彌
復神馳彙於十七年接收故都府院時初親德範今者
先生已八十有四翹首北雲每生遙睇

重陽風雨漸滿城來休沐之餘校詩是務忽書一截句
以自勞也

翻羨詩人蘇子穀遺篇故舊爲肥梳邇來湖海瘡痍在
那有心情校魯魚

麗語玄思夢絕塵王生才調豈無倫明珠智慧蛟龍奪
什認沉吟痛哭人

民國十九年秋十月世彙記於秣陵客次

待名集自薦語

溯以金陵既陷寇賊縱橫烽火故鄉鶯花南國傾攀天
踏海之心闕覓字尋詩之境此其所感爲何如耶邇者
山城枯處禪坐銷時慷慨萬方風雲一谷宇宙值龍驤
之會吾生猶鼎盛之年衝兩劍門聽猿巫峽積其叢想
寫以自娛獨朋儕好我往復傳吟以其孤鬱餘箋散佚
無益屬付寫官以存昔境人原無似集以待名忽忽得
二百數十首釐爲二卷謂爲去憶來憂兩俱可也

民國二十二年二月貴池王世孫記

猛悔樓詩卷第四

貴池 王世彛

待名集上

挹江別墅晨起對鍾山作

終古秦淮月一涯
烏衣朱雀門新嗟
春鏡舊曲飄良夜
隔谷繁陰認帝家
心倘能安寧萬碾國
無可語惜微譁
明知衆象歸无象
猶向孤城數浪花

吳淞聽海歸作

中年意態珍哀樂
棘目蒼生略可懷
身縱非輪心作轂
劫如能盡海成灰
故人肝膽存行卷
大地瘡痍入酒杯

跡象至輕終至惜夕風坐聽水音回

將別

將別關山壯臨流涕笑訛心眞疑海立人似得秋多冷
句忘情覓驚風何處歌回舟傷落日萬境此蹉跎

無感

江寒海沸鬱深悲積毀叢譽了不疑多淚誰知吾輩意
論才偏值不情時青鐙照史行行泣芳樹當風惘惘辭
一種峻懷兩年少掇心無語起長思

弋磯山病院養疴有答

螢陣侵鐙此寂居高寒惻羽競相呼飄蕭隊主夢入閭世

沉滯東牆罪後書百輩安危焚骨盡無邊恩怨治生疏
懸知簫鼓虛樓臥仄淚容憂信有餘

幾年

幾年心力鍾山道騎士騶奴共一車積淚總關天下計
撫膺未忘昔年迂梵音高處層層覓孤憤人間寸寸餘
差喜書來能念我漠雲宮樹鬱長歎

黃梅宿松道中遇雨宿張氏塾終夕無寐時戰事

方酣

溪風逐澗盡滄浪落落孤懷水一鄉疾鳥散飛緣近暮
輕篋顛顛欲迷方湯湯江漢幾來去莽莽人天孰聖狂

尺尺虛堂坐聽雨可憐簾外得南唐

宿松雜句

惘惘寸燐馳獨夜遲遲野月亦當時
掇心欲語忽無語
萬象燈前豈爾知

野水初盈時礙步垂楊乍滿或飄門
荒城幾劫餘春在
感逝能無近一尊

恰近寒卮理鬢絲繁憂深淺酒痕知
東風綠盡重重路
家祭虛陳泣此時

餘生呼父呼天意二十六年孤淚多
覓得青山如掌大
萬烽深處一哀歌

痛哭金兵夜渡河千年蹤跡一高歌
荒荒秋草將軍骨
壯麗關山心事多

渡河躍馬尋常事豈合文書老
一樓冷雨墜花成
慰歎
吾心猶寄萬枝頭

感爾年年侵骨思翻於輕別
重心期孔壠急渡黃梅雨
獨起支窗君或知

萬境年年逐逝憂此心春減漸餘秋
朱樓昨夕明如畫
一例寒煙散夕愁

駐景艱辛酒作城夕笳最動古今情
男兒了却尋常事
欲棄儒冠便此行

海水長飛海亦枯百年能賸幾頭顱坐將日月盟屠狗
午夜思來孰一沽

廬山雪夜偕孫藕蓀宋杰及內子燕華同登

江上濤飛未逝川迎人今又月珠圓心疑海激殘餘石
身置冰封慘澹天攬鏡無因成默歎當春誰忽啓沉絃
年光負盡山河壯市沸何曾慰九邊

贈燕華

惜離吾汝意偶別得歡期簾外蕭疏雨絃間宛轉絲寸
憂焚骨夕萬念據燈時相見頭同白悠然攬鏡遲

初秋移筦黔權所居臨南明河散步有作

聖狂萬古意均微擲此豪雄海嶽飛散淚山河風細拾
經春城郭柳初圍生憐傲骨終難折老有幽棲亦可歸
忍更堂前問興廢冷鷗無處不寒磯

筑市苗村觀舞

沉沉寸念夜箏微感此荒茫草木飛故里園林三徑暮
西風簫鼓半村圍遲來廢院苔初積落盡秋花人未歸
一自心波堅舊約斷難忘事只漁磯

文家園後窗野梅盛發折作瓶供以娛晨夕迨園
中花謝而吾室猶暗香盪漾也

冷盡人間得爾溫凌波朱萼入朱門始憐攀折終衰棄

猶喜橫斜此倖存
天未弄姿照遙月
風前流睇向孤村
亦知歲歲逢君日
華髮潛滋壽一尊

山夜

吾生落寞復雄奇
海國山鄉獨爾知
何處行星是肝膽
蟲鐙歷歷不眠時

海沸天荒誓未刪
江關易拔獨禪關
元戎慷慨殷憂意
支此乾坤今古間

蟻工營穴蜂藏蜜
血是葡萄濕戰袍
一念能堅應結實
不成狂涕亦飛濤

痛泣佯歡力自持
長江濁浪鬥清辭
餘暉廢宅春來綠

寸草蕭蕭繞墓祠

躍馬橫戈壽此尊
尊前雙涕意何溫
拭尊拭涕了無象
心上捫尋未報恩

繁坐寧知獨坐思
萬塵一一織飛絲
偶然心逐飄零世
只此靈犀惻惻持

恩怨如城寇百重
寒峯暮此微鐘了
然來往人天際
青史行行有去蹤

寂居漸失今何日
縱飲翻憂無盡年
細數籬花幾開落
有人心淚已桑田

年復當年日昨日
寸思渺渺積今時
滄波萬逝無消息

寫盡人間決絕辭

馬蕭蕭地戰神祠焚盡心危病亦持簾末寒英無數墜
不因風處耐人思

念親

晨起悄然坐憂樂集生平感念永逝父訓我半無成感
念永逝母終宵淚長傾親逝瞬越歲憂離初未經池濱
吾故宅廢瓦昔所營華屋痛山邱况茲骨肉情長兄與
稚妹千里巴江清大姊伏鄉曲家毀日夕驚仲姊江以
南音問渺秋鷹稚弟依弱妹聞之心漸寧故都冰應結
珍愛看陰晴余則偕弱婦岑寂棲山城簿書日以積物

望日以輕眷言望天末淚濕心曲深遙知握泣日愁髮
墜無聲長夕復長夕觸緒夢更生南鴻以風至思之倦
眼明

戊寅初來渝述職寓臨長江上游江聲夜沸不能
成眠行歸黔矣晨起寫此

偶坐晨雲更落暉嘉陵急雨蜀山飛誰知澤畔侵尋誤
漸信人間感慨非欲遏光芒歸閔默略憐風格入輕微
名江自古何曾返只我思潮盪復歸

自行都返黔途中病滯桐梓

衝雪長途逝宵來怨豈勝冬因秋意重夢偶故人曾肺

沸年衰見山殘月照仍悠悠傳萬念今往共荒燈

戊寅舊除夕時居南明河畔

一二三烽火動吟邊萬緒荒夷夜獨然重見春波移甲子
忍持臘淚照山川南明煖入回衰劑天日青存報國年
更向親祠陳歲事蠶眠微廢海微田

燈夕有雨雪時故鄉戰禍正烈偶作次前均

一戍愁邊卽九邊春燈然盡意猶然深垂重幕因多雪
獨立清流歎逝川寒疾投荒終自許孤兒報國定何年
親恩萬疊黔山上清夢能無繞墓田

太慈橋鄉居得昆明羅羔執同學書

凍鴿傳箋語絕溫孤城寂坐此荒村豪華豈意成微歎
痛哭何曾有罪言然盡肺肝知鬢短歷窮湖海只愁尊
更衝晨雨蕭然出籬右山花默默存

萬塵

萬塵了了謝孤諱翻愛山城聽暮笳荒却年來只華髮
心無凝滯願無涯

晚渡南泉夜近午矣

晚雲垂處枕溪流流轉雲回得此樓午夢關河供戰伐
丁年心力擅恩仇淪夷肝膽依依在起伏山城子子憂
偶拾林花澹忘象涼州風露入渝州

南泉夜坐

謝別崎嶇地臨波照獨歸生惟幽憤熾人尙昔年非曠
代狂無似名山願更違孤兒稽粉骨報國答春暉

吾忽墜天地飄思萬念頻江頭猶昨雨心未自微塵慷
慨臨風照蕭寥逐夢陳久疑生意盡骨燼復輕嘔

嘉陵江晚眺次行巖先生均

獨靜頻傳隔市譁秋霖爭損廢園花樓危猶隊主衰時夢
境沸眞疑煮後茶急漲帆輕亂鷗舍遙江霧重濕人家
淪夷豈必堪微歎只此潛居鬢已華

己卯重九履川招飲一心花園再次前均

勁葉會騰萬雨譁了知心似最遲花半山寒翠秋添色
一語蒼涼病減茶蜀魄千年啼故國齊煙九點認誰家
西風吹縹登臨面忍更危闌問歲華

江樓夜起時波蘭戰事正急余於一九二九年夏
奉命至荷蘭參加國際商務會議道出華沙風
物冠北歐今思之乃如異代矣

疾雨寒從靜極驚萬松遙遞一箏鳴亦知流涕了無益
其奈回思尙有情沉陸久疑今日變染圖誰惜百城輕
明戈夜祝明堂捷海水狂飛豈一生

南都陷後二年作

白門冬柳已蕭蕭爲此神傷夕復朝陵樹連雲猶作綠
鯨風吹淚最添潮心期借箸天難問髮欲忘梳病更凋
記取櫻湖紅雨夕幾人惆悵向今宵

羅灣履川寓樓鐘集

夕風吹老會遊寺寺門題滿荒涼字小別江南疊片憂
雕闌漸腐人何異我自上都走蜀岷山音浩浩入閭閻
吟邊冷集豈易事秋花窈窕秋蟲馴撫此襟懷億萬載
嘉陵水逝沉憂在朝夕飛寒潮汐傾可堪人散風如海
當前快意薄公卿一語能奇萬姓驚坐老山河成歎息
始知此境最難名

冬霧疊前韻

俯取秋聲鐘滿寺樓中人樵齊梁字一擲乾坤萬古心
古狂今聖原無異香霧微茫繞夕岷望中管樂誰聞聞
天將曠代屠龍手付與尊前意肯馴羨夢悲歡忘歲載
叢星儲淚依依在不辨星痕與淚痕一初心彼拂人海
列塚當年蜀列卿祠堂蔓草了無驚會當掠髮入山去
雪覆冰封太古名

夜歸再疊前均

幽懷絕似僧無寺古蟲冷蝕興亡字鬱盡崑崙冰雪哀
可堪華髮臨流異悄立空江對遠岷意中山水獨聞聞

山齋勝集得天地憂與歡爭各未馴貯骨繁思如重載
遙山疊霧層層在雨沸星明又一時幾樹新桑換入海
列史陳陳臥帝卿魚龍舞倦冷鷗驚誰珍箋末紅泥印
人似秋花失姓名

閒鷗

吳鉤引恨動簾鉤簾外疏花各自愁微有情時千宛轉
斷無人處一沉憂春隨海水潮頭去夢逐關山笛裏浮
不問天風問吾意半生靈鷲半閒鷗

歲暮

慨念平生誤夙期九重挾策此何時春來不信詩能好

境往方知意足師豈必故山堪據臥獨尋心史作然疑
長淮浪濁長風壯此意辛勤獻歲遲

己卯臘日得屯溪鄉人書有約隱黃山之語次鏡
予均寄舍

尊此歸棲日悠然歲又新萬方多壘急一臥故山貧冷
卉沉沉發高吟落落眞吾廬果何許楚澤作新津

己卯除夕次鏡予均

冷髮盈梳撫逝蹤巖居歡爲歲星濃久持荆棘長生訣
漸詫邱陵萬嶽宗箋憤只應哀故國廢眠豈獨誤疏鐘
縱橫胡騎今何夕知嚙江南幾樹松

錢止歲

錢歲人傾獻歲杯江風次第覓春回憑闌風雨心能濕
種樹園林蠹未裁詩外溫磨思解佩眉端消息誤猜枚
紅箋不寫憂時語更爲多忘一寫來

庚辰元日再次前均

世難欣持未易杯相期文藻釀春回傾城冠蓋誰憂樂
絕塞風雲自剪裁伏櫪無奇晨束草衝寒不語夜銜枚
今宵何境樓金碧預擬花時謝客來

養疾羅灣用尹默先生見示均

寫盡心經字字會信陵狂藥漸難勝縱然清到梅花味

辛苦斯花百未能

待池州家人書不至再次前均

偶然歡境得何曾薄霧堆簷望豈勝了了南天看烽火
百無一可只僧能

羅灣寓樓花開鄰舍電傳舞樂三二用前均

擁舞狂筇怨豈會了知斷夢憶何勝重樓燈煮荒山鶴
縱欲忘詩忍獨能

早春念鄉事用韻初見示均

疾雨低簷萬馬行春歸獨此最關情了知珠幕溫如昨
無那瓶花墜空有聲

山徑登覽近晚歸見新月寫此

薄月依山萬象明去帆輕似故人情眞游豈誤煙波約
予艷猶防桃李爭在莒寧須驚歲晚沼吳會見及身盟
斜風掠盡燕然淚濕透春裘又此行

躬耕

躬耕微願亦何成一樹宮鶯詫兩京若有奇憂寒雨夕
了無多語故人情遙波幾疊迷鷗跡廢閣千尋坐月明
縱省他年花信好瓶間春半悴山城

拾翠詞

樓居經旬不復願聞樓外事倚闌悴立花蕊迎

人則此境此心又在樓之最佳處矣瓶枝漸謝
如入微憂墜葉殘英忽滿几案冷雲却握遙霧
依山濕月吟痕猶存肝肺得詩凡十因名拾翠

云

歷亂風時復霧時獨來拾翠此江湄花枝更比桑條弱
次第春深墜廢祠

鯨波狂立耐長思明滅山鏡照此詩人似春蠶工作繭
繭成人亦鬢如絲

刺蓄豔睇竟黃昏古屋苔生潤古魂不立風危人亦病
藥香聞雜數枝溫

細路輕塵坐夕明擁書
乞取漁村共此生

國門懸目賦蕪城剛省
有人擁淚待黎明

東南海綠月如灰迢遞
今年人又看花來

荒盡天花依約來山風
誤盡人間磊落才

雷音磨道出危崖千頃
靈禽簷角着生涯

花市溫寒一訊來
桃根生葉換紅瑰
棄崖議與平戎策
何只朱門刺可哀

苔老簾閒迹更疏
忘言鏡裏髮飄梳
從知心倦人天際
只在鷄啼一二初

月夕自防空隧歸寫巖隱詩

奪夢長音雜信疑
朱燈遙自衆譁知
雲高鐵羽飄沉響
月上銀天寫憤詩
一炬風橫連肆盡
滿巖人淬釋囚遲
平生懷願今粗驗
蟻穴侯封證此時

聞巴黎陷

虎大歐雲葉大詩
危巢今亦見人危
雄師陵谷千年誓

豪注鎚銖一代奇故殿漸蕪星漸隕繁蟲何怨史何辭
忽忽戰馬新芻後却曳降車絡繹時

小磨灘夕步

荷風篁霧動茫茫歷亂鄰塘夕徑荒苔滿蟲階猶昨跡
人臨禽海已新桑詩殘雲許蒼涼補境仄秋真寂莫忘
著史歸田兩無計挑燈重起少年狂

庚辰七夕頂家院晚坐時海棠溪初炸因念南泉

諸君

風養輕篁欲暮門遐方何涕不離痕心危絕歎蟲餘葉
吠密欣存劫後村九死關河名氏賤半衣緘札夢魂溫

瑤思如水櫻心記把瑟明河誓昨存

庚辰九日登北泉草亭

久病初復聞德義日盟於柏林此狂寇自焚策
也夫結遠友而樹強仇重隅見而忘實助昧於
計事輕於料人一擲興亡莫此爲甚吾國自抗
倭軍興四經重九洪波雖惡勝算可操山海初
移風雲益壯際茲勝日小立叢巖作句記之

初秋楓影覆眉深病起新亭試一臨豈有關河非故物
漸多風雨結輕陰四天劫燒千夫血九折江流一往心
微惜白頭微自廢高山猿跡費相尋

瀉岸驚濤激石危東南猿鶴
溫谷猶欣葉墜遲待取邊鴻
拔山分作男兒業喜此濃秋

離北泉前夕

楓冷禪枯駐古顏幾回心置
密雨愁攜畫稿還忍以殷憂
偶然聽水聞鷗語獨倚危闌
庚辰秋半理四年來旅
之

斷詩止酒頻年意忍向微茫破

人天功業兩能成

少年覓句追溫李中歲論才集衆家憂樂至今心力敵
萬蟲聲裏聽微譁

在苦亡秦耿此心天風浩蕩片憂侵冬來雨雪盈途積
瓶上花溫意獨尋

獨歎何能奪衆歡危闌當日亦朱闌未央宮闕尋常事
次第黎明取史看

冬供

庚辰臘不盡四日馳念往昔迎撫來茲病餘心
悴殆無可言偶取水仙蠟梅茶花之屬納之瓦

瓶以作冬供寫此在意盡意不盡之間耳

冬供虛楹豔絕辛亂中臙盡最愁人年年麗語消兵氣
小隊弓鞋踏洛塵

親恩鄰愛逐年兼夢入承平淚乍添幃影飄零臙復臙
山河清供最慳慳

綠米蟲餘一斗腰風多惟有樹能描十年京洛狂塵畔
雪甚寒甘立此宵

細語沙中世已聞雁衝雲陣入兵氛久無骸骨將何乞
人似關河老夕曛

冰結雲屯不渡河千年人物最嗟峨可堪水繞山環劫

及見中原蟻聚多

歧路涼州卽熱河
厭聞低調與高歌
飄夷分是吾曹業
采薇尋薇事豈訛

林音初 羨怨爲虹破國雄才鬱欲東
饑渴雷鷹飛萬點
王侯如蟻拜重瞳

危燈搖落動平明
一象千哀跡試憑
身自在山心赴海
何須清濁問嘉陵

爾輩

爾輩清流付濁流
崑崙急雪覆從頭
生平已遂歸田願
了了人生了杞憂

薄月盈尊尙舊存一無秋處坐籬門漸知心厭心潮發
謝酒其如只酒溫

略無能事只眞愛似有人言亦可歡太息江山新月上
幾回圓缺尙微聞

嫩涼千萬何須入病枕剛剛態作涼一霎熱河消息斷
北風心地已秋霜

欺名著述丹青誤更誤丹青乞食來此例古來寧未有
蟲燈纏夢史徘徊

好風吹作嫩寒生山脚人聞山上聲翻喜山農最親切
澗邊汲與古今情

半持疾怨半持怒併作人間有月明乞照海枯無恙水
有無心地見桑生

晨至上清寺買花

細豔人肩重怨恩長街紅洗小樓昏好風平等無今古
入史山花一一存

風透羅裳隔霧橫澄江水軟覺魚輕邇來心地將誰測
恰似飄花墜澗聲

上清寺側選春風辛苦瓶枝傲盼中翻覆天工幾惆悵
今年花滿去年叢

三眠柳舞奈風何流睇江潭種最多珠米年光買花意

只緣花發舊山河

卷一

十七

猛悔樓詩卷第五

貴池 王世貞

待名集下

春早讀報寫近事

槍林彈果摘新詩一決來因信更疑此境平生未曾有
天飛海立釣鯨時

側目鯨天半廢墟蓋棺空賸慕城書狂瞳衰髮依稀見
盟紙倉皇付蠹魚

廢閣苔深月漸移無邊春織鬢邊絲蜀宮鈴語中興捷
珍重關河爲荔枝

卷二
墜夢飄塵黯古痕不情風雨亂寒溫賣花聲出上清寺
可信江南紅幾村

林花一二墜簷間拾取殘英故故妍丞相祠荒桑似海
亂離人轉羨蠶眠

小闌干末亂雲流春半山城似早秋別有情懷君未識
一二歡語雜閒憂

回首車塵雜夢塵夢中因果疊前身卽今初綠潛潛發
綠似江南一故人

危樓舊夢鬱嶙峋風下花歸陌上塵別有填胸勞悴語
千金敝帚作文人

夏初

初夏雨疾簷坐不眠葉綠入座垣顏忽驚此誠
平生未有之境俄而江沸天飛山騰雲黑此境
又失遂然燈寫句或可刻畫其萬一也

憶取花時例有詩詩情深淺紙痕知年年惶恐蒼生願
愧泣親祠告祭時

絕憶風高月薄遲童心刻境境成詩倚勞阿母親梳髮
視此霜華嘆可知

豪淚依稀襟上存斷無猶豫對狂尊檢來白髮將誰數
絕似幽花謝滿門

半濁嘉陵半燭紅
男兒心力飼魚蟲
平生癡絕緣情最
巧婦何曾解作翁

樹倚危臺透燭微
人生何地不芳菲
獄中事最驚心記

冰淚清瑩孰是非

紀五四入獄事

人言臣罪一燈蒼極怒層憂
了不藏誰解洪流流去意
回音再聽待天荒

瓦漏心驚坐曉明
滿園風立與雲橫
可堪春水初生夕
又聽危簷急雨聲

亂燈擁夢漸成圍
飄劫難尋炸後衣
更怯宵寒明日又
風高蝶只着苔飛

雲重鷗輕拍水飛故人共啜故山薇
心塵慵拭襟塵積
併作浮塵入斗歸

萬象飄馳駐未能來因水涸佛然燈
高寒久濯名川足
只有斜纓濯未曾

農歷五月十六晚雨夕臥至聖宮何園炸後漏屋

中終夜忘眠晨起寫一詩不哀不怨不怒更不
歡也

臣知多罪故當誅略撫餘生百不如綸劫久無平世想
忘情猶盼遠人書一哀天狗晴猶墮九死江魚水可居
忍計風狂兼雨惡人眠廢瓦雀爭墟

歷亂生如星亂流花前人奪片燈憂依山樓閣成微睡
拔地烽煙盪夕愁舊徑瓦迷芳草步暮雲鐘喚白鷗留
將軍揖客狂如昔九族今猶共此頭

早春和鈞師以詩來記除夕事次均以呈時風雪

甫霽星洲正不守也

衰甚心甘到處家宜春帖小願無涯重關誤信軍難撼
疾雪寒欺絮未加歲事萬千餘昨象膽瓶開落又新花
明年此注今年定裘盡誰知酒可賒

南區公園晚坐

定詩字字倦風雷眉角蒼茫掃幾堆疾景漫疑雲盡幻

奇憂眞見海同來
寒流掩淚成孤往
斷簡剝心寫古哀
我自有生生有象
夕陽暗替好樓臺

昨夕暢雨晨至南區公園小坐得句

江流曲走計猶訛
一繞山灣聲更多
疾雨似青愁壁壘
濕雲會冪古關河
坐曹豈分閒閒老
對景其如落落何
一自東南摧勁羽
九天孔雀采難摩

春雨初霽至華巖看所留草屋

芸人謀己兩何功
只有花時太息工
晴宇蟄騰蟲擾擾
危牆隙列蟻叢叢
歸村幾點燈爲舍
去日千歡夢亦宮
揮手人天來去水
略慚愁已渡江東

炸後入渝州途次

重樓依約辨殘墟入劫鷄蟲覺不如風黑心隨鯨赴海
憂深人學蠹侵書青溪小渡村歌散沃火危岡巷哭初
天自生才天自賊悔持哀怨付長歎

履川屢促題飛無集詩成稿旋失之詩以奉會

城居絕似蚊成市雷動難呼斷夢來復國預儲憂國淚
幾生併作一生灰漸忘姓氏摩孤劍暗換關河賸此杯
廢紙叢中蟲半葉有人心血繞千回

衙齋枯坐庭花幾開落矣寫以解寂

暖撲初花蝶夢訛我來三三認樹顏酡生歸萬瀑爭危注

靜透重樓喜遠歌未省憂時爲日少落驕人處只愁多
長寒江上輕衣濕此是東風作態苛

歸遲

閒味年年坐一隅微風集處看雲趨半生顛顛餘孤憤
九死艱難羨一誅豈有壯懷真此了漸漸華髮向人殊
紙層心淺無端疊萬語爭如片念虛

玉露

玉露無霜菊待開最能秋處又楓回千年端禮忘名石
一炬咸陽得意灰鄉夢漸堆波沸海天毀未解市成雷
芳馨猶可東籬采獨據危樓自不才

玉露飄零月細開伊人小舞門寒回酒邊甲子沉沉計
絃上憂歡漠漠灰漸喜心波通碧海漫疑眉語鬱輕雷
奇哀天壤渾難忘看老縱橫一世才

無題

極豔翻從極冷來熾人肝肺月徘徊何須風雨持燈坐
始覺山城曉角哀

哀庚白

破海驚濤事萬千神龍跡象太翩然悠悠人去忘言別
黯黯詩殘未盡妍生覆危巢傷乳燕死尋疑塚問啼鴉
負君一事微茫裏牆上蟲痕蝕舊牋

積淚艱於散後兵幾升今復通人傾倚闌風雨搜燈坐
定霸才名刻意爭世縱知君詩已末天原長曠問難明
卜居早共蠹沙盡甲子休勞卜太平

悼獨秀師

沙灘清論葬同邱奇俊天成第一流壯涕心潮掀海內
晚持孤抱釣江頭千年不信神光滅此夕翻添異代愁
欲向墓門隕危涕墓門深在萬松疇

危闌

危闌獨立太怱怱此境情甘掩映中候食漸知珠桂味
置身悔入笏簪叢半生升斗量孤淚一葉瘡痍畫夕風

無限蟲沙吾盡識四垣兵氣繞如虹

四十生日

四十衰顏詫鏡中忽忽兒髻半成翁百年龍門生何幸
小徑蟲吟曲漸工身後是非無耳目當前意慨卽英雄
分明一樣沙塲淚灑向名塲便不同

雜詩

身擲狂波海亦非徘徊心惜繞斜暉可堪鼎沸觀魚樂
忍見羅張作鳥依

失憶詩如別夢哀低歌歡意雜憂來年人在春燈外
好處春燈望幾回

亂鶯取次透清譁不睡翻知惜露華此境前生亦曾有
無名入似已衰花

把臂殘山失姓名憂來宛轉半縱橫寸心偶作南朝笛
華髮持燈次第生

幕外風添鬢角沙長河無定願無涯春來更獻花神祝
可肯寒溫護此花

蜀中寒暖太離常五月山城擁被嘗簷外曉風吹夢好
榴花正滿故江鄉

狼籍丹鑪火尙青十年前事此重經何當一臥空山雨
好淚飄零夢影冥

但見春歸客未歸五年廬舍夢依稀
澄清有願終虛卜絕悔心香帶魄飛

慚愧江樓坐霧輕山城起伏與雲爭
可堪風雨迷離夕猶夢餘生入太平

蜀山如畫憶南明畫角叢飛壯士營
肝膽付君君不識始知此淚最難名

讀和鈞師防空隧詩依均奉會

疾雨輕雷散萬埃人眞怒馬忽銜枚
豈期浩渺煙波外却送迷離憂患來
欲忘奇哀餘化石略然枯淚亦成灰
平生歡喜從頭記好月千山菊一堆

刪稿

中歲憂歡次第會誰憐
搜句坐寒燈明知句已平庸極
約略詩壇步幾層

哀江南去病猶疑廟祭無多酌
一卮誰省王郎鑿句意
極天際海有餘思

吾生

吾生歷歷寫山河似此安閒福已多
一病醫眞疑脈象
未涼燈忽見愁魔片帆來去江無意
小劫因緣佛定訛
獨坐荒煙無寸念清墟半岸起漁歌

此淚

此淚會添碧海遙無名幽恨月難描心萍浪逐鬢眉白
不忍江頭坐晚潮

莫愁意態翻多悔薄命危時例有詩試取明朝好花朵
歲時次第釀春遲

亂離東晉誤王戎幾葉青燈掩照中意態至今難解釋
不成鸞鳳已沙蟲

和履川

朱簾拖地碧簾鉤漠漠層臺逼上樓此境古來寧未有
不珍歡處却添愁

幾折荒隄柳姓楊一一亭館賸蒼茫花時何處東風薄

弟一無情數夕陽

羅衫輕暖奈心涼
珍重還珠醉一場
夢似東西橫掠慣
何須好影憶橫塘

題履川飛無集

豪醉明瑤畔
風輕羅帶飛
針停穿淚細
麝病釀香微
舊國春燈聽
重門白馬肥
古愁眞萬疊
不臥又朝暉

風雨新亭坐
眉痕印酒杯
霧秋沉雁陣
錦字織蛛灰
鳳翅飄何極
瑤思費此才
偶揮風韻語
風鶴莫輕猜

珍取羅敷語
使君魂或蘇
題緣彌憾有
狂欲仰天呼
壓夢羅儒重
沉音江雁孤
銀塘千頃碧
猶灌恨苗無

倚闌

覓句何難取境難珠簾依次透春寒書生豈爲哀時出
其奈層憂獨倚闌

獨往心眞太古時今生冰雪昨生期春風悔坐千紅裏
如羨飄英自未知

清淺疑能接古歡無名身世謚偏難嘉陵一漲潮平岸
莫作尋常風雨看

紫李朱櫻換壯顏年年無計坐花間心波飛打星河畔
可有垂楊似此閒

濤音奔夢競成圍萬染戎衣血是非夜夜有人持鳳燭

雷車如蟻擁花歸

長衢幾折似長門冷絕江頭步未溫
月魄豈知眉意瘦
偶然跡象又黃昏

豪雨兼風霧未開長昏黯黯換樓臺
乞盟縱許鷗能解
翻笑人禽共渡來

落落巖花瑟瑟妍難歸鄉夢一蕭然
驚濤長逝山城古
清濁依稀繞目前

寥寂生涯倦此心微憂益縱百憂侵
五年南渡荒茫淚
無限關河掩目尋

寸淚如絲織復回嫩風風積古時灰
細雲且莫辭樓去

好伴神歡縹緲來

畫角

畫角江城破寂時
籬花薄怨又誰知
星飛光碎迷千劫
秋老寒生積一詩
中酒襟懷人散盡
當風庭院夢還遲
年來怯數辭人髮
其奈風前損幾絲

渝樓秋病

病倦豈喜秋秋深
豈喜病觸此往復
哀歷歷明燈映躑
躑蜀宮隈宮花異
晨鏡不有亂離來
何知珍昔境匿笑
朱門茶誰識寒泉
性西風亦已嚴細
菊亦已競柳非鬢
邊肥月減眉尖靚
一寸五湖心舟樓
歌舞盛碎事誤平

生多奇在奇政嗟余果焉居湘靈卜無竟感此須臾間
已傷今古併一飲復奚疑餘生久忘姓

對菊

豪筴蛛塵跡半灰秋魂終古偶然回明知桃李多顏色
故向花時略后開

慣從籬畔作低哦小小恆河水最苛朱紫漸爲人所棄
嫩黃此或得天多

急雨秋光逐隊流名湖花可滿枝頭風簾影瘦眞愁絕
何處黃金買莫愁

茂陵舊事又今生半夕秋心繞作城人海又飛鄉釀熟

一齊和淚養花成

曉風密露入淒然劫裏江南換不眠身世綢繆心宛轉
有人葉底作秋蟬

亂英拾取未寒時點染蒼苔供入詩休問風狂兼雨噩
膽瓶穩坐二三枝

歇臺子秋坐

村舍偶居漸忘城市憂之所及漸次忘言適以
壬午秋七月四十初度病婦鄉隣借鷄市酒以
歸因而有念不僅哀親傷國已也

釣鯨射虎事何奇掉首風雷擲不辭
衾似故山殘缺擁

天如中酒古今疑一函珍重疏成客劃代關河例入詩
小小草廬只遮雨雨絲添了鬢邊絲

繞林寒漲拭吳鉤劃與悲歡各半秋來去年華託啼雁
死生消息問閒鷗廢祠草長因無祭曠代才難豈此休
今日桑枯子何異絲成好織玉人裘

星河明滅破簾流半漲心波半夕愁填海淺深何計問
逼人風露不情秋難尋故國忘詩坐漸減歡懷只藥留
生是輕塵散無處亂山紅葉拾心頭

去日何曾解有難瞞人秋色上闌干懸知風雨他生更
休覓江關別夢殘蟲靜只雲微可約山深得酒或能歡

南湖一水情千頃紫蟹青蓮待作餐

聖戰史詩

皇皇聖戰悲涼在劫外危樓宛轉尋大海疾風起天末
絕憐心淺意何深

斷難忍事盡孤忠九死千辛略略同只有元戎定風雨
飛寒已出萬山叢

北海鯨盟南海鷹重洋億頃浪花爭萬年一夕猶秋碧
此是人生未了情

島上人疑星隕裂海濱風弄霧微茫田家五百今猶健
慷慨真難弔國殤

縱橫四百萬方里奴役一億以上人天地生才此梟目
楚歌小出繞來因

元戎小坐定崑崙薄意深知動九閩落落襟懷天上月
清輝照史萬行存

山樓

夏繞山樓萬葉浮峯痕大地是微漚淚真人海將枯碧
心似星河到曉愁換劫頭顛判暫擲懸天肝膽豈全休
邇來空谷軍書捷萬種眉波託一舟

東南

東南飛海水往事夢堪驚神霧堂堂合兵塵脈脈橫定

能生智慧窮亦是功名兩戒河山在干憂略未平

雜詩

欲臥故山餘采蕨難尋去夢已然燈長河收拾清流在
好寫他年怨更層

細紅碎碧畫春袍最苦征衣綠久凋一種依依襟上意
萬千汗血憶今宵

自矜金碧樓臺好豈及寒鴉暮色眞繡戶朱門煙霧冪
可知滄海幾驚塵

勤持後約沉沉記更取離觴默默豪二月江南好風味

山頭紅盡煮櫻桃

淪劫河山夢亦灰強傾孤淚入深杯平生恥作干人語
今日朱門刺可哀

殘春山雨連雲墜斜照江帆透霧歸一葉陰晴滿天趣
小庭花落見苔肥

眉意蕩如經宿酒江波雜有故鄉鱸十分春漲朱樓夕
猶有心情似昔無

飄蕭隊裏寂無聲薄雪飄春踽踽行林下雪融禽作曲
初春閒事最關情

一生事業誤於酒半世功名賸有詩渡口當年醉桃葉
冬來神霧此何時

夕簫悲動古今情歡涕能逢漢臘聲別有至情溢星斗
王郎豈獨以詩鳴

邇來花謝人無恙隊裏何須乞子看我有斬蛟身手在
眼波到處是狂瀾

千重寒疾一衾秋醫病誰能醫客愁細事文章餘可想
無情漸覺是神州

夕陽今又壓樓低萬象徘徊漫自疑最笑歡時因夢斷
春殘風雨耐長思

吾意何疑天已棄詩狂真見海同來乾坤久作澄清注
一語興亡夢自哀

枯燈然肺意沉沉夢似殘星散不尋翻恨江頭有微月
天風吹處奪簾侵

在莒應堅他日約報韓會受世臣書微憐猿臂聞身手
射虎平原豈不如

極感層歡一例尊冬風吹雪積荒門亦知病減年年髮
親塚歸尋杜宇魂

書生折檻應投流古淚沉沉試一收負盡親恩勞盡骨
有生無地乞無憂

風雪羅京識御顏帝家哀樂動民間狂歡戲擲情塲注
一擲乾坤更等閒

曉雨欲飄離燕影好雲還繞畫闌前獨傾古巷花時酒
此是東南劫起年

香供騷心鼠蝕魂久忘魏闕只夷門將軍揖客狂終惜
偶爾憐君偶爾尊

默默緇塵鬢角侵隆中無地著龍吟獨來野閣荒涯立
誰識王郎萬劫心

吾生適此墜人間千古興衰一往還國恨親恩都未報
堂堂肝膽愧朱顏

隊去髮無聲數未會如雲海水憶何勝從知心倦江潭樹
一雨婆娑謝未能

美人肝膽詩難敵細數明珠滯淚圓萬域奮飛聞比翼
未安猿鶴北山眠

衾寒月寂鴛鴦侶亭古秋看雕鷲羣稍負殊芳例風雨
蛾眉幽怨半山雲

病夕

江水循何地心枯只脈流故人猶在苦宗國欲興周愁
裏山河淚吟邊草木秋益知催夢意得此釋千憂

織樹

織樹新鶯漸一城炊煙斷續此何情久攜身世關河共
小立風雲意態生淚豈能妨填海計人難再乞與鷗盟

憂來清濁同歸盡翻問黃山平未平

歸難語婦

半叟歸田未可期強攜柔涕入危卮人生是處有荆棘
一種芳馨幸汝知

晨寒小坐

晨寒小坐依依意一坐小樓如故國初憐奪得古今魂
古井沉沉今月缺又憐擲骨長安塵塵似飛從玉人闕
重憐病步蜀山風病有所因向誰說縱橫細樹見新芽
吐綠供人新舊閱吾生豈復有多年忍看江山如此別

將別渝城

積歲棲遲此故城別來翻覺不勝情
桃花無限江南岸
紛向王郎送一程

猛悔樓詩補遺

貴池 王世孫

松右雜詩

挾刺朱門謝未經空將懷策負蒼生
江山文物原墟墓此意堂堂却未平

故人埋骨此山中惘惘情懷日日同
亦欲趁潮過江去葛衣又怯石尤風

次續蘅均

寒波流怨繞蕪城萬簇秋煙向夕生
大谷盤鷹終未倦高松礙月竟遲明
心傷故國輕相許夢老閒鷗忍獨盟

極目蟲沙關塞遠漢家無策不求成

調甫生平所爲詩不自愛惜散失頗多兩京變後遺佚尤夥此二首蓋錄自采風錄者其用夜起均悼晚秋夫人五古十餘首手稿藏余滬寓篋中今亦無從採取亦惟有俟收京後補刊耳竊願其生平交舊有藏其遺稿爲此冊所未錄者寫以見寄俾得續刊以成全璧則私心所企禱者也克崇識

猛悔樓詩跋

余既窮三月之力校調甫詩竟義不能無以發其意余
惟調甫詩之幽麗深婉樊山翁既發之矣余更何言獨
念與調甫論交近二十年蹤跡初故未密及播遷西來
患難相扶持乃相處若家人余雖盛讚其詩調甫於余
詩則未嘗有所論列也及其既逝其夫人以校理之事
命余南海黃子祖耀獨謂余曰調甫逝前二三月一日
語祖耀吾詩不欲履川點竄以宗尙異也惟異日吾身
後定吾詩者非履川莫屬烏乎故人知我深余何能無
言乎蓋詩者窮人之業也古工爲詩者非執筆學爲如

此之詩也其始豈僅以詩人自期志有所弗酬意有所不通傷其遇哀其時不得已而後作焉耳此自漢魏以來名能詩者所共由之道因其性情之所近面目之各異雖宗派各別而其鬱於中思以其學用世有以易天下則無不同也然則調甫之詩所爲哀傷歎託豈以一身通塞爲哉其流露於楮墨間意量與古詩人無殊者可按而知也夫負異絕俗之士孰不有用世意然或則萃千百豪雋心力窮老盡氣而無所措手或則三數庸愚舉而控搏之而有餘是豈才之不同哉其勢則然也則以調甫之才居今日之會與令其操尺寸而至於束

手太息無可如何憂傷勞瘁以死孰若令其浮沈郎署
寄悲悶怨哀於篇章使後之讀者猶得低徊歎悼惜其
不遇而致其無窮之慨烏乎此千百年以來詩人所共
循之塗轍而超絕之士所爲甘老死隴下遁跡逃名不
欲役志於功名之會者也而運會盛衰興廢之微人才
消長剝復之機亦於此可覘其故矣然則調甫所爲畢
生役志於是且諄諄以斯事見託者其微旨不尤可見
哉其微旨不尤可見哉民國二十二年二月閩侯會克
端謹撰

之知言君子民國二十二年二月無錫孫燕華謹撰

